

四庫全書

集部

欽定四庫全書

文定集卷十七

宋 汪應辰 撰

啟

謝解啟

鄉里之選宜先老成輩行甚卑乃叨舉首初非所敢望

以為榮伏念洋

宋史汪應辰本傳應辰初名洋及第後以與姓字有語病特賜改應辰此啟像

謝解時作故尚仍舊名

志大心勞才疎學陋焚膏繼晷探求聖賢

之用心束帶遠遊周覽山川之秀氣雖王公大人未嘗識其面目而先生長者亦多借之齒牙承師問道于庠序之間論世尚友于方冊之上篤在自信敢求速成其為士者笑之皆曰子之迂也屬盛時之側席下明詔以搜賢竊羞童子之雕蟲請對諸儒而折角視荀揚賈馬之作何足道哉有虞夏商周之書皆雅言也固當去彼而取此安敢是古而非今淬礪辭鋒墾鋤藝圃千萬人吾往矣二三子何患焉共驚一介之微豪奪三軍之師

自量踰分推庇有階此蓋伏遇判府侍郎閎闕名家珪
璋素望揭二天之日月被千里之江山買犢買牛淨洗
潢池之刀劒采芹采藻一新泮水之衣冠熙然廣信之
區盡被洙濱之化致茲庸下亦預選掄洋敢不求為可
知勉所未至騰文章萬丈之燄掃筆陣千人之軍鯤化
為鵬垂北海長風之便豹變則虎脫南山隱霧之縱過
此以還未知所措

上虞宣撫

伏以經武斗樞之庭宣風井絡之野安危所寄內外惟均注意特隆具瞻胥慶恭惟宣撫樞密知院受才宏博蘊德純全以孝為事君之忠以仁為救物之勇我戰則克蓋傳心于聖門匪夷所思獨取必于天理經畫世故調撫政幾無施不宜有本如是雖舉身而遠引亟承命以遄歸惟蜀僻在一隅惟帝明見萬里當宁太息命公往釐靡憚暑行之勤以寬旰食之慮制勝堂上即坐收于全功拜相軍中當復見于盛事益沛為霖之潤永扶

置器之安應辰疏拙無庸知照有素免于罪戾恣蒙庇
冒之恩奉以周旋茲復趨承之幸其為欣忭實倍等夷

與呂經略

愆期有待欲罷不能忽承折簡之音已遂交符之幸反
初服而自慶稱故吏以知歸事有從來感無以喻伏念
某寒鄉晚出薄宦遠遊數口無飢姑全生于升斗一日
必葺惟竭力于簿書既踰瓜時尚復匏繫邦人見察偶
未推擠親老懷歸自難啟處不遑假寐如有隱憂天其

憐之分乃莅止奉令承教開心見誠雖斷斷無他獨慰
藉之良厚彼捷捷欲譖終浸潤之不行自惟眇然何以
得此而復察私計之曲折閔微蹤之滯留使沿公牒之
行實遂安輿之奉招延更僕臨餞出郊特屈常尊蔑聞
往列惟卒伍之凌雜方道塗之阻脩三令五申之既嚴
百舍重趼而無倦望故國之喬木初非敢期賴中流之
一壺乃克有濟方將反命大府謝恩公庭事與願而相
違慙且懼而交戰謂宜督過益厚拊存有味之言疊拜

嘉于翰墨無功之祿併受賜于康庖部室生光涸轍蒙
潤迄依巨庇以獲終更此蓋伏遇某官美繼八元聲冠
九牧負宏材而使人也器都貴位而急士之窮不聽畸
偏之辭自敦特達之義應辰有同子立誰為先容始末
保全纖悉調護筋骨瑟縮固無可用之資肝膽輪囷徒
懷欲報之意仰惟遠業簡在清衷已奏銅柱之功即趨
金節之召歸艤可望庶伏謁于道旁大厦既成永依棲
于宇下

與廣西陳經略

伏審期年報政獨推漕最之優十國為速就倚帥符之
重惟周邦之咸喜如大厦之既成恭惟某官天界全能
世濟其美屹若鎮時之望薰然接物之仁探索羣言既
逢原而自得醕酢萬變固投刃以皆虛無施不宜有本
如是自舒翹于俊域即布武于要津紆郡綬則民有田
里之安擁使華則吏有簡書之畏因仍舊部進領元戎
昔已致于澄清今豈勞于施設應辰抗塵末路託迹後

車將有賴于公庥尤不勝其厚幸

與方經略

甫罷郡佐復叨恩除飢寒所驅道路云遠惟是甚幸得其所依疇昔諸公之並遊從容一顧之特厚志在流水每懷知己之言身如浮雲寢閣趨風之地竊不自意適為此行託美蔭以息肩聞妙音而忘味事非偶爾天寶畀之某官器采翹明風度凝遠閱衆甫以致用追前修而與歸推自得之學以及人混混乎盈科而後進挾不

資之材而應物恢恢乎游刃之有餘所謂無施而不宜
蓋其有本者如是帝念嶺表地遠朝廷特分委于漕權
仍就更于帥閫歲華再閱與頌四騰明試以功宜有康
侯之蕃錫入告乃后更觀方叔之壯猷自顧奇窮方欣
際會譬諸草木宜以臭味而見存畏此簡書庶乎罪戾
之或免政恐即膺于召節不容久託于後車瞻仰之誠
敎言罔既

與沈安撫

伏念涉道甚疎抗塵云久一違冊府三奉宮祠受祿無功幸少延于涸轍出門有礙因自錮于荒山方惟菽水之謀寧復詩書之夢茲蒙廟論俾飲郡條彈冠振衣復收還于舊觀扶老携幼竊自比于常人既奉令于屬城敢修辭于下吏伏惟某官高文綯發偉論鮮明舒翹揚英名不容于自晦批卻導竅才每見于竝窮不已于行所至可紀阜餘財于劇部待明制于清時雖仕路之所榮顧師言之未厭自閭以外有嚴帥節之雄大江以西

尤謂价藩之重斲勤填拊普洽隆平旬月之間令已修于庭戶九河之潤福更及于京師凡吏于茲豈勝其幸迹同韓子出意見以無繇心仰弱翁霽威嚴之是望庶以恩臨之故未為罪斥之人依賴之誠叙言固既

與吳提舉

伏審垂傳一封來臨使事先庚三日寅布詔條民言交欣王命增重伏惟某官天才卓越儒術精詳學逢其原以闕衆甫文出于已自成一家有猷復見于有為所譽

悲符于所試而乃回翔久次之地徧閱後來之英屬結
綬于中都且問津于要路顧樂鄉閭之便自祈原隰之
行遠有光華雖式嚴于臨遣周爰咨度宜即奉于論思
應辰自為成童則已受教竒窮至此姑為升斗之謀幸
會適然又託帡幪之庇其為欣忭豈易敷陳

與吳宣撫

東甌蕃屏之嚴未能報政西蜀兵民之寄益愧非才嘗
力貢于忱詞終莫回于成命將就帡幪之庇輒修咫尺

之書恭惟宣撫少師相公貫日精忠濟時英略棠棣之
華韡韡繼當閭制之雄南山維石巖巖復陟臺司之貴
應接關輔蔽遮江淮肇敏戎公盡護諸將執訊獲醜已
摧獫狁之鋒保勝安邊方倚營平之畧地雖遠而實本
根之勢身雖外而為社稷之臣是謂功勞而位尊尤宜
託重而持力顧慚疎拙竊幸依承治法征謀既軍旅之
未學風聲氣俗復語言之不通第殫夙夜之寅益謹周
旋之奉庶幾免戾非復言功歸向之誠敷陳罔既

又

祇奉詔旨謬持帥節抱舟遡峽幸險阻之無他入境交
符歎拊綏之未易仰止宣威之重隱然制閭之雄庶幾
蒙休其或免戾恭惟宣撫少師相公精忠許國英略濟
時地壓西南繫江淮之根本望隆中外兼將相之威儀
不自有于成功方益恢于遠畧奮張師旅靖強敵之窺
邊指顧關河慰遺民之思漢既策勲于為冠宜受祉于
無窮應辰猥以非才偶茲承乏藜藿不采但見田間之

安風雨攸除實依夏屋之庇其為欣幸罔既敷陳

與總領汪少卿

伏念某技無他長窮有定數蓬山咫尺風引去以難親
木偶東西雨流行而未已雖安蹇薄之分未免飢寒之
憂仰蒙上恩游至郡寄遠道百舍豈重趼之敢辭中流
一壺視千金而奚啻矧復廷臣之重久當使指之嚴昔
已賴于保持今仍依于臨按茲為幸甚殆匪徒然恭惟
某官學識高明才猷敏飭宿望獨高于省寺羣知皆避

其威嚴屬邦計之浩繁紆皇華而興領錢流于地雖稱
劉晏之功刃發于硯豈識庖丁之妙即登大任乃究遠
圖某無以亢身苟焉竊祿論臭味于草木敢曰宗盟謹
期會于簿書庶逃吏責尚祈終惠使得全安傾仰之誠
數陳罔既

與提刑黃察院

叨蒙恩除往佐郡寄屬當會府實建外臺欽乃攸司曰
得親承于善教茫其所賴勢宜特異于他邦竊自懼然

殆非偶爾其官宏材絕衆敏識造微舒翹揚英于多士
之辰明目張膽于可言之地惟風憲無分于內外而刑
章尤賴于平亭特迂使華以惠嶺表發硎游刃曾何費
于緒餘策足要津行即膺于枋任應辰謀不及遠仕止
為貧中流方仰于一壺百舍敢辭于重趼幸威嚴之少
霽庶罪戾之可逃不遂聾丞或念送迎之費願師委吏
每彈會計之勤依仰之誠敷陳罔既

與知信州程尚書

伏審祇奉中詔出分左符惟信美之肇州本鄱陽之折
壤河潤九里久已接于餘波我獨二天今親承于仁政
聞命而喜有心所同恭惟某官冠冕士倫表儀禁路高
丈大冊發為國華覈論危言播在人口是以彌年家食
有其如蒼生之憂一日詔還有既見君子之喜所以致
此夫豈偶然方需顯庸盡發賢蘊後凋之節要歲寒而
始知勇退之心雖急流而莫禦斂此餘刃施于專城人
誇衣錦之榮誰識浮雲之志某仰高滋久願見無階不

獨與此邦之人安其田里庶幾聞長者之論奉以周旋
其為歡娛倍萬夷等

與趙經幹

伏審既被辟書即奉俞旨轅門增重桂嶺有輝伏惟某
官蔚以卿材生于公族仁厚皆如麟趾夙著清芬弦歌
焉用牛刀亟登最課屬南邦之開鎮虛右席以招賢雖
之處于囊中昔知己其特異羅而致之幕下今豈待于
先容姑藉佐戎之謀實為儲帥之地某去德云久竊祿

于茲特承警欵之音更託帡幪之庇其為欣忭豈易敷
陳

與福建王運使

伏審祇奉詔音出持漕節先聲所暨輿論交欣恭惟某
官識造精微學窮浩博文采英華之發自成一家風流
清白之傳于今五世既上應于列宿宜立登于要津惟
中外更迭之文具存近制方始初清明之政尤重遠民
輓紆使輶來接閩部佇聞最課益究遠猷應辰方領州

符正依德庇其為欣忭罔既敷陳

與成都李運使

某官材猷敏劬學識高深明習憲章于殘闕之餘緣節
吏事于倥偬之際宜在登瀛之選乃勤使蜀之行誇努
矢之前驅殆非素志憂樵蕘之後爨益濟多艱佇奏休
功進膺異數

與司馬運使

某官材猷敏劬學識高明惟阿衡專美有商宜臧孫有

後于魯蓬瀛寓直姑循序進之常襄漢宿師暫倚轉輸
之重佇凝最課即繼前休竊承臨按于上流當獲逢迎
于中道

與晁都大

伏審載揚前旆冒盛暑之裨延俯壓近郊適孟秋之初
吉念去德之云久每邇風而實勤將有遠行尚少留于
頃刻亦既見止庶自慰于渴飢欣忭之誠數陳罔既

與運使察院

伏審肅持漕節臨按炎方置郵之命初騰載路之聲交
慶恭惟某官學貫千載文成一家追前輩以擅場晚要
津而策足鋒車促召輕辭蜀道之難黼座對揚絕出漢
庭之右亟躋憲府游委使華遂令五嶺之區亦幸二天
之庇宣聖主丕冒海隅之德運公家如流地上之財即
著休功遂膺大任應辰頃在京國獲登門牆悵歲月之
幾何歎雲泥之相望方且全生于斗水豈期託蔭于華
櫟欣忭之誠敷陳罔既

納幣啟

不顯亦世仰風流之具存惟好是求忘門地之非偶伏
承某官第幾女富有家法嫻于婦儀而某從弟朝議位
長男某甫逮成人之年猥當貺室之重諏辰其吉奉幣
以前藉之用茅姑致誠于菲薄比其所賴尚徵福于方
將

文定集卷十七

欽定四庫全書

欽定集卷十八

宋 汪應辰 撰

啟

賀陳左相兼樞密使

伏審對揚休命兼領鴻樞主意方隆具瞻胥慶恭惟某
官高明而碩大篤實而疏通格于皇天式是百辟身任
安危之寄心忘物我之私密啟建儲首開萬世之福決

策禦侮坐判衆人之疑如丙吉之不言如謝安之無競
志雖切于遠引上益堅于仰成惟萬幾當出于中書迨
五季始分于右府雖聖明之有作亦沿革之不常議非
僉諧動輒抵牾或宿師而攻守之計不決或奏功而賞
罰之令各行人無適從事鮮能濟欲救斯敝必惟其人
爰咨上公盡總二枋既示君臣之無間亦由左右之具
宜方且宣宥密緝熙之勞專發縱指示之畧按邊郡策
益贊漢宣之明披輿地圖終歸鄧禹之畫有識所望不

謀而同應辰分符海濱引領門下其為欣忭實倍等夷
賀沈左相進書加恩

伏審紀閔休于竹帛趣具奏篇增峻秩于銀青繼頒渙
號郵音旁達輿論交欣恭惟某官與學造微弘材經遠
見幾萬物之表發策衆人之先寤主一言帝知人而則
哲和茂五利民受賜以到今粵當總攬之辰首冠弼諧
之地期年而變庶績其凝惟我宋肇邦盡革五代八姓
因循之敝迨主上復古適追一祖七宗丕顯之謨宜有

特書大書之傳以明前聖後聖之懿王通之序漢七制
韓愈之作唐一經孰謂熙朝之郅隆乃容鉅典之久缺
疇咨上宰總領諸儒發凡皆本于周公折衷取裁于夫
子潤色祖業既以稱我后奉先之誠對揚王休又以致
大臣歸美之誼赫赫姜任之族姓振振文武之子孫或
溯測于淵源或分別其派緒毫髮殆無于遺恨網羅幾
盡于舊聞惟大章實賴于一藝故令聞有光于三代薦
之宗廟簡在帝心參訂故常申加徽數作君臣相悅之

樂豈徒事于虛文立邦家太平之基將益觀于實效應
辰屬以補外無由至前瞻頌之誠數陳罔究

賀呂經略進職

伏審祇奉寵光併增職秩元侯以德懷遠明主之賞當
功播為美談聳動羣聽恭惟某官機神穎邁智慮高明
事雖甚難決江河而莫禦才無不具吞雲夢而有餘紆
郡綬則流移之民襁負而來歸擁使華則貪猾之吏股
弁而引去席郎位之清要總軍儲之浩煩刃若發硎錢

如流地曰咨文武之畧往殿東南之隅麾幟之色增明
抱鼓之聲不作標柱敢踰于約束獻琛爭效于忠誠惟
彼南丹恃其狡穴溪巖重複篁箐蔽遮種類旁連易以
嘯聚孔道百出難于周防秋蹂稼以為常晝攫金而無
憚潦霧交作兵久戍而多傷舟車不通民轉輸者倍費
付之無策迨此累年雖為虺當戒于弗除而彈雀復牽
于所重或恫疑虛喝而適足以來其慢或選要畏避而
不足以弭其驕爰自教條一新輿誦四洽聞先聲而禡

魄仰嘉惠以垂涎諭以民生捨其往過皆委命于下吏
願為氓于一塵侏僂列拜于轅門騏驥悲輸于上廐屈
其羣醜同我太平未嘗煩一卒之勞何止活千人之命
飛章列上褒詔亟頒永為已試之功行有非常之寵應
辰去違麾下屏伏山中莫倍冉冉之趨第極欣欣之喜
賀廣東經畧方敷文

伏審進直西清作鎮南海是為盛選允協僉俞恭惟某
官才具淹賅機神穎邁批卻導竅從容皆中于宮商舒

翹揚英特達不資于繅藉無忝乃祖克壯其猷簡于淵
衷授以間外果報成于善政復申錫于贊書寵數維新
事權增重內臨鎮于百粵外羈屬於羣蠻帕首袴鞬爭
望塵于道左卉裳黽結皆聽命于幕中必且並行恩威
明示條教吏有貪泉之恥物無厲氣之虞雖五方之民
願藏于市重九譯之國來獻其琛有以致朝廷之尊然
後居公卿之位應辰間關薄宦竭蹶長塗方幸依仁遽
承易地側聽羣言之慶敢懷一己之私

賀廣西漕運使

伏審欽承詔音典領漕計促行之命絡繹于道途交賀之聲洋溢乎嶺海諒戴星而就職即諏日以頒條伏惟某官學識淵微風猷翹爽繼平陽相國之烈光太史世家之傳發舒智謀顯著聲績坐鎮上游之會亟登最課之優眷茲桂林象郡之遐付以山國虎符之重醜聖主之澤若決江河籠公家之財不失圭撮益觀能事進對殊休應辰久矣仰高幸茲備吏及仄未代偶沿檄于江

東已事當竣即瞻風于闕右依歸之至竭蹶而趨

賀張樞密

伏審祇奉詔音進登樞府廟堂增重朝野交欣恭惟某
官道大而方氣剛以直出入中外幾四十年反覆是非
蓋千百變屹乎其中立不倚綽乎其從容有常年高而
德愈新身退而名愈白想風采者或意其魁梧而奇偉
問起居者皆願其壽考而康寧世不我忘政將焉往屬
王明之有作果台節之亟頒沆回雅志之堅以慰具瞻

之久今之急務人所共知有一言可以興邦曰上策莫如自治使還至而有效顧力行之何如惟老成重于典刑而名實加于上下意有所同為無不成解弦更張已陳激切之論置郵傳命願見設施之方幸成千載之逢力救萬方之病庶幾大節無愧古人應辰方遠守于海隅莫進趨于門下其為依仰實倍等夷

賀汪樞密

伏審誕揚明制進長元樞帝眷特隆民瞻胥慶恭惟某

官英猷經遠宿望冠時執法當朝言底可績宣威制勝
令出惟行越參政幾協濟國事文武備足左右具宜絕
域亦知其名在廷無出其右於皇新政方懋遠圖偃戢
干戈仁雖存于兼愛綢繆牖戶患猶謹于豫防曰咨元
老之猷式固中興之業以聞望則惟舊以謀猷則具臧
既茂建于使名復優加于寵數惟太尉之在漢室與相
維鈞而熙寧之待潞公其命特異參稽往制簡自淵衷
以示非常之恩以明爰立之意武功七德益恢可大之

規說命三篇即正久虛之位悒悒四海師表羣工應辰
久託餘光欣聞傳命方分符于閩外阻望履于幕中

賀凌司諫

光膺制命顯直諫垣郵置傳聞薦紳胥慶恭惟某官學
窮聖與德冠民彝善不期于近名仁固宜于有勇待時
而動果膺聖主之求正學以言不負官名之重茲為序
進益示眷知品秩雖殊權實均于宰相謀猷有補澤將
下于生民聳聽休聲益觀治效應辰夙蒙異眷方託餘

光屬郡綬之拘縻阻賓庭之旅謁

賀楊總領

伏審亞卿太府總計四川明命既傳輿情胥慶恭惟總
領少卿風猷凝遠氣度淵閑前視禁塗不詭終朝之遇
俯臨遠郡自安直道之行惟蜀一方養兵億計人力已
困曾無宿儲邊隅雖寧愈復增賦詔旨丁寧而惠澤之
猶壅丈移旁午而議論之未諧必惟高明能定取予茲
利權之盡付將政令之一新僚屬洗心疲氓引領顧惟

疎拙素辱照知冀協濟于多艱願敬聞于餘教其為欣
忭因既敷陳

賀虞宣撫

伏審某官屈元樞之尊大全蜀之寄自任以重陋昔人
畫錦之榮不已于行體聖主宵衣之念藐茲孤宦辱在
下風將致屬鞬之恭獲諧望履之願其為欣忭實倍等
夷

賀趙安撫

伏審諏辰泰筮開府神皋威望所臨輿情胥慶恭惟某
官學窮浩博識造精微恢游刃之新硎自諧節奏策要
津之高足豈限尋常洊擁使華獨登課最帝城不遠整
借重于保釐天子是毗行入陪于近密應辰夙蒙知眷
方託庇休欣忭之誠敷陳罔既

賀福帥曾尚書

伏審光膺明命起鎮巨藩方面得人士民胥慶恭惟知
府安撫閣學尚書學高儒苑望重漢廷夙崇靜退之風

久處燕閒之地宸衷簡在物論攸歸果承綸綍之褒付
以帥師之任褰帷入境已增渙于江山頒詔宣風行興
謠于襦袴顧茲迂拙蚤荷照知屏伏山林幸遂依于餘
芘瞻承眉宇欣將奉于緒言慰忭之私敷宣罔既

賀汪學士

伏審某官奉承大對擢真巍科凡在見聞莫不歎羨仰
惟世德蓋嘗參翊于政塗矧復天倫今乃竝升于榜甲
併為盛事著在輿言既能自致于聲名必且遠追于風

烈而某繆司貢士竊自喜于得人獲託宗盟又庶幾于
蒙潤特勤都騎躬致長牋慰荷之誠數陳因遂

賀浙東趙安撫

伏審對敷明命填拊大藩閭制增雄輿言胥慶恭惟某
官宗支毓秀賢路蜚英皇華幾徧于四方最課游登于
二府既資高而望重亦屬近而行尊大雅不羣宜繼疏
封之寵徐行後長訖全雅操之堅帝眷浙河以東地連
魏闕之下命之作牧倚以維城方簡注之特隆諒名還

之不遠應辰備員支郡引領前驅欣忭之誠敷宣罔既
賀趙總領

伏審欽承明詔進陟正卿帝眷加隆與言胥慶恭惟總
領大卿學覃浩博識造淵微年輩俱高歸靈光之獨在
精明益劬恢游刃之有餘惟蜀一隅宿師億計給餽餉
不絕糧道操贏貲以佐軍興三年有成熟先于課最九
德咸事特峻于班聯式邁其歸可立而待應辰依仁有
素聞命載欣方坐困于簡書莫進趨于牆屏其為向往

國既敷陳

賀吳宣撫

伏審進升帝傳真啟王封典策流傳搢紳欽聳恭惟某
官宏才冠世敏識幾神臨事制宜沛江河之莫禦竭誠
徇國凜山嶽之不移偉伯季之繼興專西南之重寄遺
黎安堵悲蒙再造之仁諸將連城屹有四維之固屬頌
溫詔促觀嚴宸靡憚暑行進承晝接會朝絕席見國體
之增崇帷幄運籌獨淵衷之默契惟高密元功之首惟

汾陽異姓之王參酌舊章合為寵數以渙太常之祀以
隆巖石之瞻不顯其光于斯為盛應辰夙蒙異眷方託
餘輝引領門牆第切拘縻之歎庇身夏屋庶無隕越之
羞欣忭之誠敷陳罔既

又

伏審造朝畢事擁節言還爰擇剛辰肇開大府宣威雖
舊易地維新恭惟某官識造神明才兼文武不顯亦世
與伯氏以代興克壯其猷揜羣公而為冠欽承溫詔入

觀嚴宸密勿廟謨便蕃天寵謂外禦其侮已底定于北
戎而我圖爾居蓋莫如于南鄭原隰平行舟車湊通以
填拊于上流以指麾于諸侯制專閫外既孟峻于等威
地亦關中示不忘于遠畧增重維坤之望永扶乾道之
隆應辰承乏無庸託庇有素俯觀遠俗方蒙田里之安
仰企崇墉第歎簡書之畏其為欣忭罔既敷陳

為虞宣撫賀正

伏以夏正三朝雖與情之胥慶尹躬一德尤百順之交

歸民具爾瞻理必有至恭惟某官為時柱石秉國樞機
金節煌煌帝咨裴度之重赤舄几几人望周公之還宜
茂對時益多受祉一相處內方承冊命之嚴三壽作朋
永協頌聲之盛應辰猥以弱植託于大鈞閱歲籥之游
更望門庭而伊阻其為禱系罔既敷陳

為吳宣撫賀正

伏以時惟行夏歲且發春陽暈進以成三物簇通而生
萬恭惟某官精忠徇國偉望冠時鄧太傅之功名豈專

將畧郭汾陽之福祿實系邦基履端惟新受祉滋厚永毗興運普濟生民應辰猥以拙疎託于庇貶莫預造門之列第增引領之勤祝頌之誠數陳罔既

又

伏以元善之長物以更新德福之基神其交相恭惟某撫太傅郡王相公忠衛社稷誠通神明冠二十八將之功卓為帝傅履三百六旬之首益迓天休邁方叔之壯猷倍汾陽之書攷進膺異數永濟生民應辰猥以拙疎

託于庇貺莫預登門之列第增引脰之勤瞻頌之誠數
陳罔既

為平江魏丞相賀正

伏以夏正三朝方更新于歲律尹躬一德實茂對于天
時恭惟某官厚重而文直方以大入持宰柄密參造化
之工出欽藩條寢廣京師之潤履端茲始受祉其多式
遒其歸永弼乃后益侈魏名之大力扶泰道之亨應辰
仰託庇休屬拘衰疾希韞鞠膺莫修慶謁之恭燕寢清

香徒想威容之盛其為瞻頌固既敷陳

為左右丞相賀正

獻歲發春式啟亨嘉之會大鈞播物實參造化之功時

所由昌福斯獨厚恭惟某官山河間氣社稷元臣

與陳樞密

云為時柱石秉國樞機

四序密移孰見燮調之迹三陽彙進自符

交泰之期極萬目之具瞻祝千齡之未艾應辰甫違省
闈出綰郡章莫伸鞠脰之恭徒切搖旌之念

回諸郡賀正

伏以首四序以為正聖經所重內三陽而成泰賢德其
亨恭惟某官學識造微材猷經遠出臨名郡已凝治最
之優茂對熙辰宜協彙征之慶進膺寵渥以愜公言念
修問之未遑辱移書之先及其為感愧罔既敷陳

回餘姚趙知縣賀正

太簇旋宮謹獻歲發春之候東風應律正贊陽出滯之
辰恭惟某官秀出天支學優聖域惟日不足懷為善最
樂之誠與時偕行體自強不息之德欽想履端之始倍

迎純嘏之常屬繫迹于匏瓜阻稱觴于椒柏遠蒙流問
祇服謙光徒深頌詠之私莫敘勤拳之意

為虞宣撫賀冬

伏以太極函三是生萬物黃鐘初九以統羣陰時令一
新輿情胥慶恭惟某官誠貫日月望塞天淵屬重華協
帝之隆應聖主得賢之盛訏謨闕遠醴假和平其往視
師式倚晉公之重爰立作相益圖商室之寧既順履于
修辰即對揚于明命應辰效官有守進謁無階欣忭之

誠數陳罔既

代答常平錢舍人賀冬

天地之心見于復物且向榮邦家之基立于賢神其薦
祉某官學窮聖域望重士林從容皆中于準繩特達不
資于繅藉御于帝所擅討論潤色之功正是國人倚師
帥承流之重陽剛寢長福履具宜即膺圖任之求以愜
具瞻之望應辰頌緣未第嘗附餘光疾病侵凌久退休
于聖世飢寒轉徙復託庇于部封徒與安其田里之民

皆有俾爾壽臧之祝

為吳宣撫賀冬

伏以土圭測景順迎化日之長雲物書祥瑞卜豐年之
慶天其發育人以歡欣恭惟某官望隆華夷功在社稷
雲臺審象孰居鄧傳之先井絡宣威正倚武侯之重宜
乘穀旦倍擁蕃禧與國同休俾民受賜應辰方茲託庇
莫遂趨風瞻頌之誠數陳罔既

為監司賀冬

大極函三是生萬彙黃鐘初九以倡率陰恭惟某官天
資特高世美惟肖百城引領皇皇使者之光華三尺持
衡井井外臺之條理王命因人而增重休聲與實而並
馳德既協于剛亨福必緣于類至實為吏屬仰託公庥
畏此簡書曾莫倍于進旅俾爾戢穀徒能誦于陳言


為劉侍郎賀冬

伏以五緯連珠起天元之密度一陽襲管迎愛日之初
長恭惟某官雅望冠時忠規奕世論思謇諤久膺明主

金史卷之八十八
卷十八
之知卧治雍容茂對與人之誦宜臨修旦倍集殊休應
辰底賴于茲瞻依未幾無從進旅陪下客之後塵徒與
居民祈使君之難老區區之意言不能殫

回李知郡賀冬

伏以太極函三是生萬物黃鐘初九以倡羣陰恭惟某
官德履粹和材猷敏劭俯觀民俗潛消愁歎之聲仰順
天時寢樂舒長之日益迓朋來之祉以符剛長之祥惟
擊柝之相聞辱移書之良厚其為感愧罔既敷陳



文定集卷十八

欽定四庫全書

集部

文定集卷十九至二十一

詳校官起居注主事_臣顧宗泰

主事_臣呂雲棟覆勘

總校官庶吉士_臣倉聖脉

校對官中書_臣吳甸華

謄錄監生_臣吳炳文

欽定四庫全書

文定集卷十九

宋 汪應辰 撰

啟

答沈總領

服在邇僚蔑聞于報效卑之輔郡仍假于寵名引退而
蒙優異之恩負疴而當浩穰之寄皆難稱塞方切戰兢
載瞻使華實總邦計庶幾託庇得以蒙休方欲修詞遽

勤惠問仰謙光之過厚愧遲鈍之後時恭惟某官學造
高明器涵剛實存心惻怛期康濟于斯時論正持平獨
力行于是道踐揚滋久聞望日新豈徒蕭何給餽之功
尤得劉晏養民之意進膺大任益究遠猷念造謁以無
從徒依仁之是幸其為向往罔既敷陳

答提宮楊朝議

簡書之畏莫遂于披承竿牘之勤亦稽于修布曾謂眷
存之厚特貽問訊之先恭惟某官才猷淵宏器尚冲雅

周旋四郡率多善政之聲偃息一廛甫遂高年之樂已
釋簪裳之累尚垂桑梓之恭豈云見私足以觀德更冀
珍有益保壽臧

答查運使

汴泗萬里跋涉三時蓋艱險之備嘗殆形神之不屬息
肩弛擔雖疲茶之少瘳問俗觀風緊撫綏之未易敢謂
眷存之厚特貽問訊之勤無以克承第知愧荷恭惟運
使直閣學問純正識造精微化未澄清暫倚登車之重

事雖肯綮豈勞游刃之餘已藹著于休聲即進膺于大
任顧惟疎拙竊幸依憑蒙霧而行自獲不言之潤同舟
以濟庶收必至之功

又

向賴均茵之舊方紆攬轡之嚴庶幾蒙成其或免戾未
遑修問先辱賜書情文並隆感愧叅集恭惟運使直閣
躬受異稟學承正傳傑然館閣之中藉甚搢紳之譽納
約自牖進盡忠嘉之言舍車而徒退安間燕之地屬元

臣之開府啟婉畫以濟時宜遂贊于廟謨乃出持於漕
節矧遠氓之凋敝復遠候之繹騷方臨槃錯之交尤藉
調肺之妙豈惟疎拙得所依憑念請謁之可期冀興居
之迭護

又

伏審乘傳一肅封將漕節先庚三日亟布教條入境之
初望風胥慶恭惟運使直閣學傳正統躬蹈聖言探索
逢原蓋顯微之無間從容應務固左右以具宜雖使指

之府更實蜀人之蒙幸顧惟疎拙復獲依承聞親戚譽
歎之音孰云遠宦從仁義燕閒之樂復如昔時方欲修
辭遽勤惠問其為欣荷罔既敷陳

答祝運使

伏審祇奉郵傳進持漕節不待贊書之下式過攬轡之
行蓋宿師十萬之嚴日需供億而發輶再三之後民久
罷勞顧方急于得人豈復拘于常法恭惟某官才猷瞻
博德度粹和踐揚屢著于賢勞出入益推于久次仕隨

所遇忘蜀道之登天政底于成俾蠻方之按堵惟茲委
寄亦已褻優應辰自視拙疎實叨雅素乃幸同舟之濟
庶諧彼岸之登未及修辭先蒙惠問其為感愧罔既敷
陳

答周運使

伏審瞻咫尺之威親承臨遣持光明之節出董輸將沂
峽良勤褰帷云始寬條既布輿論交欣恭惟某官學識
疏通材猷敏効從容醕酢恢然游刃之餘揚厯淹回湛

若重淵之靜惟聖主不忘于遠俗欲疲氓皆識于上恩
姑偕重於澄清即進膺于遠擢自惟承乏所幸同寅念
請見之無由辱移書之良厚其為愧荷罔既敷陳

答趙運使

伏審寓直瀛洲將漕夔峽遠民良幸興論交欣恭惟某
官以敏博之才行仁厚之政屬州縣水旱相仍之後方
倉廩朝夕不繼之時賑給困窮拊摩痼瘵盜賊遠屏流
傭復還既課最之著聞果詔音之褒擢愛人利物諒誠

心之不移問俗觀風惠澤之益廣顧惟承乏淹獲同寅
特承問訊之勤殊感眷存之渥其為欣荷罔既敷陳

答潼川提刑運使

伏審祇奉除書洵持漕節休聲云遠輿論交欣恭惟某
官學識賅通材猷敏効從容醕酢恢然游刃之餘敷歷
淹回湛若重淵之靜暫紆使節以惠遠方惟此疲氓困
于重賦利入已贏于十倍安取厥餘詔音雖至于再三
未知攸濟當按臨之甫始已利病之前知切聞緒言欲

卷十九
救宿弊惟誠心之所格終公論之必伸應辰去德十年
遡風萬里豈期甚幸獲罪同寅未遑問訊之勤先辱緘
題之貺其為感愧罔既敷陳

答趙總領

伏審以其官名亟奉于詔音不俟駕行式虔于君命顧
惟疎拙久獲依承三尺拘縻莫陪于出祖一隅留滯徒
仰于登仙方欲修辭遽蒙惠問既切違離之歎更增愧
荷之誠恭惟某官學識精微才猷宏博老而克壯宿乃

彌明總出納于四川竭勤誠于三載宿師十萬平居猶
患于闕供發輶再三應猝每多于餘裕存登卿列簡在
上心式過其歸將益觀于遠畫知與為取當宏濟于多
艱願庇護于寢甕以對揚于休寵

答觀使韋節使

伏審揚于王庭授以峻節兼親賢之盛選符中外之公
言某官美秀而文威儀是力仰紹金籙之學藉甚家聲
久從琳館之游超然物表屬東朝之有慶眷外氏之多

賢擇曰設壇特重麾旄之寄比名併牒更增附夢之榮
自惟州縣之徒勞所謂雲泥之相望不敢輒修于賀問
迺蒙先墜于緘滕三命益恭知寵光之未艾多文為富
顧疵陋以何堪欣感之誠敷陳罔既

答晁制置

召還萬里擢長六卿杖杜勤歸蓋特矜于永久積薪居
上竊自歎于後來每念叨逾豈勝戰慄敢謂眷存之渥
特紓誨問之臨譽雖過情義豈云薄恭惟某官宏才任

重敏識造微御史諫官振直聲于多士方伯連帥流忠
化于遠民肆帝眷之惟新舉坤維而盡護雖節以制度
前追忠定之規撫而薰然慈仁盖本文元之心法顧惟
疇昔嘗獲瞻承偶逃絀免之科遂記踐更之契三年無
補既蒙藏疾之私一旦誤恩並出噓枯之論道路云遠
情文益隆惟感愧之所并豈敷陳之能究

回總領王郎中

伏審進登即位外總軍儲始布教條一新觀聽恭惟某

官罷能敏裕識慮高明知無不為期竭忠而尊主言底
可績恥譁衆以取榮踐揚居多名實兼茂乃眷上流之
重方嚴勁旅之屯陸走水浮轉輸之費增倍頭會箕歛
痼瘵之民未蘇竊聽平生之言每懷憂世之志將使公
私之均濟佇觀次第之設施益懋遠猷亟膺大任方圖
修問遽辱賜書既懷不敏之慚且見相先之誼其為感
佩罔既敷陳

答李提刑

伏審欽奉詔書持憲節先聲云及輿論交欣恭惟提
刑敷文識慮精明才猷宏博仙李之根遠矣世德彌芳
常棣之夢韡然相門未艾視彼黃閣實吾青氈而乃俯
就外官坐成遺老郡守監司之寄幾徧厯于四方門生
故吏之餘或先登于要路矧茲夔峽亦辱使軺庶獄紛
紜幸平反之無害疲民凋瘵賴賑卹之有方苟種德之
可為豈屈身之足問顧惟嬾拙久幸依承茲復同寅庶
幾蒙益枉誨音之良厚知眷意之特隆感媿之懷敷陳

罔既

回程提舶

睽遠風度洊易歲華各在一隅殆將萬里心雖無間迹
若相忘茲被命以言歸幸邇風之稍近方圖修問遽辱
貽書見眷予之不忘審起居之多福恭惟某官才周浩
劇識究精微屈伊洛之名家臨夷蠻之互市海舶四集
益豐財貨之源官曹一清無復脂膏之潤已被襲嘉之
渥即膺進擢之優應辰方此丐閒庶幾養病無從披晤

第切傾馳塵穴所叢敷陳罔既

答勾龍提宮

祇奉詔除叨分閭寄惟蜀地實同于濟魯而漢朝繼出于淵雲究觀源流想見人物方願聞其姓字遽辱貺于書詞情文竝隆感慰何已恭惟某官材猷敏劬學識疏通踐揚久著于賢勞斂退樂從于閒適賢不家食方屬于明時士有特招佇聞于休命將遂披瞻之願更祈寢饋之調向往之誠敷陳罔既

回通判徐提宮

為郎無補久宜襍被之行將母有求輒冒分符之寄地
當旬服里有仁人方幸親依遽蒙問訊執謙過厚知鄉
黨之恂恂養志自如審吉祥之止止恭惟某官材猷敏
幼學識高明發游刃之新研自諧節奏策要津之高足
宜限期程何游佐于藩條復退安于祠館其室則邇雖
未遂于趨風厥木惟喬竊有期于庇賴

答馬舍人

奔走遠宦經從治邦項背相望問勞之詞狎至肴核維
旅殷勤之意有加屬既領于郡符恍已更于歲籥未遑
修問又辱移書益諗眷存之隆且增遲鈍之愧審豈弟
之多裕固祥福之大來恭惟某官器蘊淵閎風猷凝遠
崛起蜀道明揚漢廷講經書之業于禁中裁訓誥之文
于天下暫茲出守行即召還念請謁之無繇冀寢興之
必護其為向往罔既敷陳

答程運幹

習聞聲跡深歷歲時敢謂眷勤首紆誨問講修先世之
好曲示過情之裒感莫能名媿無以稱恭惟運幹學士
受材膚敏制行溫恭趨而過庭親承問學之富行不由
徑益見操修之堅凡士論之所期曰家聲之是似顧惟
晚進及識前修仰風烈之如存喜典刑之有繼末由造
請第切傾馳倍覲保綏亟膺進用

答查運判

竊以自昔才難莫如閩外于今任重尤在蜀中豈意空

疎亦叨寄屬於舟邈峽幸險阻之無他入境觀風歎撫
綏之未易伏辱眷私之舊特迂誨問之勤此蓋運使直
閣持自收之謙篤相先之義兩喜必多溢美顧莫稱于
褒揚久要不忘平生願繼聞于告戒其為感慰罔既敷
陳

回鄭狀元啟

伏審某官條陳大對首魁諸儒凡在見聞莫不稱羨三
年之科第尚矣而獨被主上親擢者尤榮一日之文詞

燦然而素為公論推重者未易兼此全美藹然休聲應
辰頃奉詔音俾司貢士方竊得人之喜庶逃不職之愆
辱都騎之過存貽長牋而見寵徒增感慰罔既敷陳

答吳殿撰

伏審某官俯就一麾僅逾三月正已以率下節用而愛
人郡吏承風皆有簡書之畏疲民受賜復知襦袴之溫
方切依仁遽聞易地奔走投牒皆願于挽留喧呶盈庭
不容于揮卻念下情之難壅因上奏以具聞豈期道路

之傳特辱音題之貺既欽勤腆復見謙沖感媿之私數
陳罔既

回王尚書賀吏部侍郎

仰承帝制攝貳天官私切省循倍增戰慄伏念應辰稟
生不腆處世多艱頃待盡于松楸俄備員于館閣推耗
百憂之後不自意全低回多士之中焉能為有所宜汰
斥乃爾叨踰以非材而領銓曹之繁以不學而參法從
之列性既疎拙勢復羈單冒昧而居顛隲是懼豈謂某

官沈潛而樂易篤實而疏通久要不忘平生每致眷憐之意兩喜必多溢美更加獎引之詞念修謝以未遑辱移音于先及其為感愧罔既敷陳

答陳安撫

謬分閫寄洊閱歲陰徒殫夙夜之勞每切淵冰之懼茲蒙賜召得遂終更釋重負之千鈞稍寬疲茶望故園之三徑漸卜歸休初非敢期竊以自幸伏蒙某官篤同寮之契好念遠戍之艱勤貺以尺書問其行李雖愧過情

之譽敢忘私淑之仁屬道路之奔馳幸門牆之密邇即
瞻符采敬布腹心欣慰之誠數陳罔既

回洪州鄧安撫

陳力無補敢曰厭安明之廬誤恩過優乃使修連帥之
職兼程就道卜日交符惟仁人之所居蓋民俗之甚厚
庶幾蒙潤遠辱賜書既慚溢美之言且見必恭之義恭
惟其官材猷宏遠學識高明攬轡登車早著澄清之最
輕裘緩帶游推鎮拊之功宜還本朝以究賢業敢祈密

護前迓殊休向往之誠敷陳罔既

回季安撫

伏審祇奉詔音鎮臨邊郡申令一下旗幟為之精明歡
謠四傳市驛至于騰貴伏惟安撫觀察才猷敏飭識慮
疏通踐揚茲多忠謹彌著得聲梁楚宜克紹于世家率
服蠻夷今正需于方畧佇聞政績以稱上恩應辰屬在
鄰封實依庇貺未遑貢問先沐移音欣感之誠敷陳罔
既

回王安撫

竊承帥節鎮俯邊城惟游刃之有餘庶同舟而獲濟未
遑修問先辱移書情文竝隆感愧參集恭惟知府安撫
中大材猷敏劬氣守堅明臨繁劇而不辭雖多益辦忤
貴權而無悔于義必為復用于聖君獨斷之時厯任于
戎事方興之際忠勞尤著夙迹具存乃眷瀘川實兼戎
索式倚懷柔之畧益觀悠久之規豈惟拙疎得所憑藉
尚阻披陳之便更祈寢餼之調

又

伏審升華法從作鎮雄藩自京邑而拊遠方之民以文
儒而易武吏之政委寄特重寵光一新觸熱視師諏辰
開府恩威已著觀聽交欣恭惟某官學識高明才猷敏
裕穎悟于眇綿之表立則參前從容于肯綮之間發皆
中節處艱難而功效愈白治浩穰而風力益彊荆居上
流晉比分峽爰輟近侍以分顧憂某才焉去德茲乃為
鄰所幸輔車之相依庶幾藜藿之不采方圖修問先辱

移書感愧之誠數陳罔既

答張都大

伏審欽承詔音就畀使指總按秦蜀拊綏夷蠻盡操闔
關之權馴致富強之業委寄甚重觀瞻一新恭惟都大
直閣學富多文才周萬事穎悟于眇繇之表立則參前
從容于肯綮之間發皆中節洊奏澄清之最遂膺擢任
之優董茶如飴外通關市之利駟鐵孔阜內壯師干之
容必且不勞而功成可使所居之官大進登要近益究

猷為應辰久矣邈風幸將展謁豈獨謹簿書之期會庶
幾聞議論之辭餘未及修辭先蒙惠問其為感愧罔既
敷陳

又

欽承告命優進職名不獲終辭第慚非據竊念某學皆
陳腐事每濶疎久滯近班無補聖世可當一面誤被于
詔除此及三年蔑聞于善最心已疲于太用齒復迫于
始衰疾病交侵形神俱敝猶幸黜幽之未及庶幾置散

之為安既莫遂于私誠乃就更于華序進退失措起居
靡皇茲蓋某官正始名流老成厚德同舟而濟夙幸于
依承有味其言每形于獎予曲成虛譽馴致誤恩更蒙
誨問之臨尤見眷存之厚其為感愧固既敷陳

回續都大

欽奉詔音謬分閫寄捫參歷井敢憚驅馳之勞臨淵履
冰未知填拊之策瞻言宿德隱若外臺豈徒庇賴之蒙
復有交符之幸人惟求舊尚眷記之不遺政必告新庶

拙疎之有望方圖修問先辱賜書情丈竝隆感慨何似
恭惟某官才猷敏幼學識高明風流追配于前修輩行
獨先于多士戶口百萬鎮荆楚之上流駭北三千總蠻
夷之互市皆第功而居最姑增秩以示褒宜還本朝益
究賢業將遂參承之願更祈寢餼之調欣仰之誠敷陳
罔既

又

伏審祇奉茂恩進升美職重斯文之論譔慰遠俗之觀

瞻恭惟某官學識高明才猷宏博淳更要劇久矣賢勞之多徧閱後來蔚然明德之舊非特典司于垆牧實惟撫輯于蠻夷最課著聞褒章亟下佇還大任益究遠猷應辰茲幸依仁方圖修問先辱惠音之厚益知秉德之謙欣荷之誠敷陳罔既

答陳都大

伏審進直道山出宣使指在垆之野欲馴致于富强自陝以西俾悉歸于康按先聲所暨輿論交欣內顧拙疎

獨蒙知照藐然孤宦越在一隅豈無他人念孰為于久
要莫非王事尤有賴于同寅乃幸依仁遽勤惠問竊承
溯洄萬里縣歷三時神明相休啟處禔福恭惟都大直
閣器涵剛實學造淵微惟于義以必為故所至而可紀
好是正直自處于靖恭範我馳驅不期于詭遇雖稍淹
于進用益足見于安恬蜀道惟艱秋陽尚熾將遂披承
之願更祈慈護之宜欣仰之誠數陳罔既

答夔路范運使

違去使華存更月朔審及瓜之既代謂行李之且來拳
拳此心日日以俟伏奉手誨如聞足音屬裨鬱之未蘇
宜起居之有相恭惟某官家傳正學躬受偉才見義必
為守職不撓已騰漕最益著賢勞雖錦里逢迎將獲親
于餘論而鋒車赴召諒非久于遠方更祈保綏以副傾
屬

答樊運使

伏審祇奉詔音存持漕節地連榆社初無叱馭之勞民

愛崇陰皆有望塵之快恭惟運使中大清明亮直寬大
惠和久矣踐揚之多居然聞望之懿力辭籲召志樂燕
閒就乘使華姑為井絡之重進裨衮職終倚樊侯之賢
即觀晚之功名前繼古之風烈顧惟疎拙夙仰耆明傾
蓋雖新情實均于久要同舟以濟幸將托于餘光未及
修辭先蒙惠問其為感愧罔既敷陳

答范運使

竊承賢哲實董輸將仰游刃之有餘庶同舟之獲濟未

遑修問先辱移書情文並隆感慰何已伏惟某官炳靈
秀氣奕世清芬學得純全之傳才周左右之用閱職寢
久蜚聲益休尚紆使華以惠遠俗矧發軔再三之後民
力已疲雖算緡百萬之多軍需僅給方講求于寬卹尤
有賴于將明益究遠猷進膺大任將遂披承之願更祈
寢饋之調欣仰之誠敷陳罔既

答馬運使

伏審祇奉詔音典司漕計矧出守之惟舊而去思之尚

新迨茲持節之復來翕然比屋之相賀不勞施設可致
澄清恭惟某官體備中和學窮浩博近侍親承于言動
直前屢効于論思敷繹精微之經納乎聖聽裁成雅奧
之訓揚于王庭已斂惠于兩川猶宣風于一道佇膺大
任益究遠猷應辰黽勉一司因循浹歲僅同贊附正賴
波餘敢謂眷勤先貽問訊其為欣荷罔既敷陳

答利路張運使

謬領帥符獲同王事于彼原隰徒想于光華畏此簡書

莫詣于請謁敢謂眷存之厚存紆問訊之勤審臨按之
多餘固吉祥之畢集恭惟某官質直而義參和以仁徧
閱後來蔚為久次肅將使指方轉輸以備邊仰繼世家
宜孝友之處內尚祈密護益迓殊休向往之誠敷陳罔
既

回江東向運使

伏審祇奉詔書出持漕節賢才復用公議少伸恭惟某
官器蘊恢閑機神穎邁慷慨于艱危之際義不辭難從

容于盤錯之前動皆中節間者退藏之云久居然涵養之愈充豈容與世以兩忘果為斯民而再起觀其所主實為元老之薦揚欽乃攸司已見外臺之增重行膺大任益究遠猷應辰夙仰高風喜聞新命未遑修問先辱賜書感愧之誠敷陳罔既

回周運使

伏審持外臺之使節已布寬條錫內史之贊書始承新渥坦然明白遠有光華恭惟運使朝議學識該通才猷

敏幼踐揚云久左右具宜眷言夔峽之轉輸擇材方急
不得漢庭之臨遣授任即行申以絲綸之言煥乎原隰
之寵不違咫尺豈徒盡臣節之恭罔墜周旋有以稱淵
衷之厚即觀最課前迓殊休應辰浚獲同寅每勤惠問
其為愧感莫既敷陳

回賀陳運使

伏審欽奉詔音肅持漕節以御史按郡國示內外之惟
均以儒者理貨財欲本末之有序上意可見輿論交欣

啓行實始于七閩采入更踰于三峽雖徒馭備嘗于險阻而神明實相于忠嘉恭惟某官學窮淵源行中繩準蚤蜚聲于俊域寢策足于憲臺範我馳驅不期于詭遇好是正直自處于靖共懇避要塗出宣明命如蜀部之西僻亦使星之下臨遠俗有光疲民何幸顧惟疎拙夙荷照知庶幾承議論之從容豈特謹簿書之期會方圖修問遽辱移書欣荷之誠敷陳罔既

答王運使

法當薦士歲有定員敢不盡忠庶幾報國豈謂眷存之
厚特形遜謝之詞雖云私書是協公議恭惟某官心存
仁厚體備中和寬而本之以明正而持之以重消田里
之愁嘆已著政聲擁原隰之光華復登課最即膺大任
乃慰公言自顧拙疎何能輕重徒增感愧罔既敷陳

又

伏審肅擁漕節按臨益州教條一新觀聽咸喜恭惟某
官允迪厥德參和以仁澹若重淵非澄撓之能動恢乎

游刃蓋剗裁而有餘休聲亟著于本朝使轍幾環于全
蜀洗岷峨之悽愴益懋遠猷浮江漢以朝宗即登近列
顧惟衰病方幸退閒鼪鼯之徑其空既茲窮僻馬牛之
風不及矧復阻修忽蒙惠問之臨持厚嘗寮之契其為
感愧豈易數陳

答新嚴州張倅

違遇十載媿音問之闕然屏居三衢幸車從之至止未
遑布詢先辱移書不忘平生良欽于厚誼既見君子將

慰于夙心恭惟某官性資高明器蘊端厚故國喬木共
仰世臣之存百川狂瀾獨傳家學之正勉隨官牒待攸
藩條即聽休聲益光前列歲華過盡陰氣沍寒更冀保
綏以符傾繫

回興業秦知縣

叨被恩除來丞郡寄誦韓吏部之句地實在于湘南求
溫處士之廬羣已空于冀北方懷風味遽辱音題既荷
芬若椒蘭之情又知敬止桑梓之義自顧涼薄何以戢

承伏惟某官學通聖言名播士類千室之邑諒宰割以
何勞九層之臺抑階升之有漸佇聞休命益究遠圖更
冀保綏以符傾禱

答董知縣

伏審勉隨宦牒來領縣章凡在庇庥皆相欣慶恭惟某
官富于學殖蔚以文鳴仲舒之黜百家實傳素業冉求
之宰千室姑踵常塗即聽治聲遂膺休命顧惟疎拙獲
遂退閒方幸依仁遽蒙惠問其為媿荷罔既敷陳

回玉山知縣

桑梓之邦久依善政萍梗之跡越在遠方茲幸言歸將
詣造請先辱惠音之厚殊欽眷意之勤恭惟某官德履
粹和才猷敏劬俯循近制出宰斯民簿書雖繁自得剴
裁之要早潦相繼尤殫撫字之勞即聽休聲遂膺異數
念承顏之伊邇先引領以載欣

回新吳江趙知縣

佐州于此弛擔之初惟十年不見之故人在一輩可杭

之比境未遑修問遽沐移音殷勤若接于笑談俯仰恍
疑于夢寐伏惟某官處心仁厚持已方廉如不勝衣孰
識王孫之貴可使為宰姑從吏部之銓曲敦雅素之歡
彌見撝謙之美其室則邇無因而前瞻詠之勤敷陳奚
既

回萬載知縣

伏承都騎來領縣章聞名久之聯事幸甚伏惟某官以
能自奮所至可稱位雖未充亦云寄百里之命志必有

在不獨為三徑之資自憐別駕之何功竊冀同舟而獲
濟特紆問候況佩勤誠

回嘉興李知縣

伏以睽違既久瞻望益賒闕然嗣音是以負媿辱書詞
之甚寵知眷注之不忘欣承起居倍納休福恭惟知縣
學士材猷敏劬學識該通淇水風流從來者遠常山政
事已去而思惟今嘉興素號劇縣戶口億計舟車四通
諒惟高才綽有餘力即登課最行奉詔褒益懋遠猷以

繼前烈應辰守官窮僻與世闊疎無復趨承之期第勤
向往之望

回山陰江知縣

叨被帝俞出分郡寄雖便私之良幸顧治劇之非長敢
謂聽聞特貽問詢執謙過厚知鄉黨之恂恂為政多餘
審吉祥之止止恭惟某官材猷敏瞻識慮疏通乘朱輪
者十人夙推世閥綰墨綬于百里姑試賢勞已著休聲
即膺異數尚祈密護式副傾瞻

回高知縣

拜恩佐郡諏日造官竊企風猷獲聯職治伏惟某官譽
推月旦節貫歲寒尚沈下僚雖未究于賢蘊以望此府
諒無媿于前修惟昔試言蓋嘗接武既歲月之云久亦
江湖之相忘豈期于今復適所願未遑通問先辱移書
感媿之誠叙言罔既

答玉山宰謝薦

備數禁塗尤宜報國投閒祠館無所效功惟于薦士之

定員尚有銓曹之著令庶幾塞責乃辱移書祇服謙勤
第增悚戢恭惟某官家傳碩學躬蹈清規出宰斯民已
休聲之藹蔚進膺明命豈常制之拘攣更冀保綏即聞
褒擢

回宜春黃知縣

奔走一官飄浮五嶺蓋人跡罕至之地亦交情可見之
時敢期百舍之遙俯致雙函之詢唱高風而敦薄發妙
語以噓枯肝膽輪囷倍切窮途之感親戚警效少寬去

國之思欣承撫字之餘坐擁休祥之至伏惟某官材猷敏幼學識高明叔度如萬頃之陂源流有自冉求為干室之邑兩地何勞即慶超遷以伸久屈好黼藻其德願益勵于遠猷毋金玉爾音尚不忘于惠教

答闕知郡

采入益州倏焉四載仰望冊府藐如九霄竊承厭直以西歸茲亦罷官而東下邂逅相遇幸獲償于夙心雍容甚都庶復見于今日側聽挈音之近遽蒙尺牘之臨恭

惟某官學識造微文章爾雅方問津于要路乃力請于分符雖不敢寧息方從奔走之勞而願延須臾少奉話言之益其為欣慰罔既敷陳

答吳知郡

伏以帝念邊郡詔用儒臣因其別駕之功授以刺史之印效已試去方見見思迨此復來翕然相和恭惟知郡朝議道心恬澹世務該通出其蓄蘊之餘發為醕酢之妙奏課連最必將益著于治聲終更亟還矧已豫頒于

召命佇膺大任悉究遠猷應辰存獲同寅庶幾蒙益辱
書見及荷意良勤

回新劔南傳知郡

伏審祇奉詔音就分郡寄瓜時甫及與議交欣恭惟某
官元祐輔弼之門靖康忠義之後能濟其美有聞于時
貌是遠方久于隨牒其容不改所養可知暫煩一麾以
福千里佇凝最課即踐要津竊承前驅將壓近境方喜
披瞻之在即遽蒙問詢之良勤感媿之誠敷陳罔既

回新化州知郡

伏審祇奉詔俞游膺郡寄遠民幸甚公論宜之伏惟某
官持已方廉處心仁恕惇兮若樸自忘健羨之心歸然
獨存益見後凋之節俯就漕臺之選聊分越徼之符諒
久屈之當伸將大來而莫禦應辰方圖貢問先辱移書
仰謙德之有光撫懦衷而增感

回化州知郡

衣冠之盛昔嘗仰邇于名門襦袴之謠今復稔聞于比

境蓋欲修辭而未果豈期惠問以相先稱譽過情避敢
稽于三舍文章溢目重何翅于萬金伏惟某官世系高
明天資翹爽敏悟于幾微之美從容于肯綮之間嶺外
一麾諒不勞于游刃日邊三節行即奉于清光賓閣尚
賒歲律云晏敢祈庇護以迓亨喜

答懷安李知郡

伏審祇奉詔音進紆郡紱瓜時而往靡辭裨暑之勞穀
旦于差即布先庚之令恭惟某官家傳繡袞業茂箕裘

文采夙成已出諸儒之右材能小試復高別駕之功始以序升乃茲出守矧庭闈之就養復伯仲之連城石君一門孟子三樂其為希有夫豈偶然屬叨分閭之嚴實賴同舟之濟移書見及荷意良殷感媿之私數陳罔既

答信州唐知府

伏審厭直蓬瀛之祕分符吳楚之交下車云初闔境咸喜恭惟某官學覃浩博辭富英華既聲名之甚都復文行之相稱好是正直確守家世之傳範我馳驅退安郡

紱之寄雖少淹于遐躅實少惠于疲氓即聽詔音以愜
公論應辰衰悴晚景羈栖異鄉竊欣桑梓之邦獲被袵
襦之澤未遑修問先辱賜書慰荷之私數陳罔既

答信州王知府

伏審欽奉詔音洵紆郡紱地兼吳楚實當水陸之衝名
繼趙張咸仰世家之懿恭惟某官材猷閎博識慮高明
黃閣調元蓋源流之有自朱轡共理果風迹之特高眷
惟信美之邦復藉惟良之政諒因民之所利必易地以

皆然即聽休聲亟膺異數應辰猥緣鄉井獲在部封念
修敬之未遑辱移書而先及其為欣荷罔既敷陳

答潼川張知府

伏審寓直西清分符東蜀以曲從于懇請故特示于褒
優下車云初浹境胥慶伏惟某官得先天康節之學俟
後世子雲之知其無施而不宜蓋有本者如是被召殆
行于萬里為邦僅及于六旬即當超遷乃復外補介于
石故能不終日艮其背所以不失時實斯道之固然抑

遠民之幸甚顧惟疎拙浮獲依承時蒙惠問之勤益見
同寅之義其為感媿罔既敷陳

回柳州萬司法

邂逅適我願遽復語離倥偬裝其懷遂稽致詢敢期眷
記先辱音題繫獎予之甚隆非虛言之宜得欣承動止
倍集吉祥伏惟某官天賦異能家傳素業六經成誦昔
已號于竒童三尺分司今暫淹于列掾佇聞休命即步
亨衢所冀保綏以符傾禱

回新喻梁縣丞

疆封相錯波所及者君之餘官守所拘塞則邇而人甚
遠曲貽惠問仰服謙勤伏惟某官天材特殊世美惟肖
一行作吏雖久著于能名再轉為丞猶未離于選調猥
緣識面之雅誤辱賞音之求方自困于泥塗復何能于
軒輊其為悚媿未易敷陳

回王縣丞

伏審載脂車轄來佐銅章得見可期為僚甚幸恭以某

官生于名閥好是懿文賞以世延姑一行而作吏事非
力致僅再轉而為丞移書粲然厚意勤止其于感忤未
易數陳

文定集卷十九

欽定四庫全書

文定集卷二十

宋 汪應辰 撰

祝文

車駕詣景靈宮朝獻祝香文

孟春

伏願誠心感格神靈鑒昭春日載陽益廣發生之德兆
民允殖悉蒙和樂之休

孟夏

伏願倍迎神貺茂對天休家用平康均庇萬方之衆物
無疵癘悉陶一氣之和

孟秋

伏願高真鑒臨諸福填委民之攸暨皆涵泳於和平歲
以有年永蠲除於疵癘

孟冬

伏願衆真孚佑萬福增隆措民物于咸寧浹華夷而均

慶

太廟別廟殿宇抽換柱木等畢工告遷神主還殿

室祝文

前期奏告

伏以有覺其楹敞宜改作不愆于素舊悉更新將祇奉
于神靈復還安于廟室仰祈昭鑒俯諒忱誠

奏安神主奏告

伏以頃命工師載新殿宇揆靈辰而叶吉奉厘主以還

初仰覲妥安永垂庇佑

修武成王殿宇裝塑畢工告遷神像祝文

維師尚父廟食學宮棟宇寢隳繕修甫畢肆遷像設還
復故常

仲春補種昭慈聖獻皇后贊宮永佑陵贊宮奏告
表文

伏以增植園林繕修棟宇爰卜仲春之吉式虔每歲之
常仰覲妥靈俾諧庀役

仲春補種安穆皇后安恭皇后殯宮祝文

寢園所寓繕葺以時屬此仲春既諏吉日將庀徒之云
始俾致告以惟虔

祭文

祭張魏公文

嗚呼輔相之業必曰格天嗟後世之籍籍角巧力以為
賢將導迎于善氣必有與天為一者焉於維我公體道
之真聖有謨訓力行以身念慮精一不已其純雖在闇

室如見大賓移所以事親者事上推所以愛己者愛人
任重道遠白首日新武夫悍卒兒童婦女聞公之名者
如仰日星望公之貌者如見父母之人之德發揚普誦
綏之斯來其孰能禦然而變故百出艱難倍嘗拯神器
于既傾遏大敵于方張既顛危之獲濟亦進退之靡常
志雖馳于幽燕跡乃滯于湖湘二十年餘再秉樞鈞百
未施其一二復異說之紛綸蓋公之所能者天其所不
能者人自古所嗟今復奚云方晏適于林泉謂永綏于

壽考胡不憊遺喪此元老應辰自昔出入公門期式瞻
于儀表以畢顧于斯文孰謂此來言無復聞既念其私
復哀彼民徒反袂而長號淚淋浪而沾巾嗚呼哀哉

祭陳相國魯國文恭公文

惟公稟氣之和體道之全渾厚純粹得于自然端委廟
堂如山如淵以公宰物以誠格天仁者之勇德人之言
有發必中有待必堅密啟建儲見幾之先決策安邊達
事之權四方既寧聖主初元公拜稽首丐歸丘園歸未

暖席詔書促還勤勞王家病不復痊當寧震悼塗人涕
漣嗟世之人挾數矜智公初無心上益注意嗟世之人
歛惠邀譽公初無言人自欽慕生榮死哀夫豈人力一
言以蔽惟其盛德應辰拙疎公實見之前後薦引始終
保持聞公之喪身在西蜀有愧古人不能匍匐痛楚摧
傷怛然此心萬里致奠公其俯臨嗚呼哀哉

祭凌尚書文

惟公氣質粹美學問純正充養既厚持守益定視其容

貌如不勝衣孰知其勇見義必為聽其議論如不出口
孰知其直言無所苟謂公為清清而有容謂公為和和
而不同人有一善或以自矜公終其身兢兢靡寧蚤以
文鳴出類拔萃歷守五郡所至稱治進冠侍從惓惓獻
納退領真祠遂老蒼雪平生百為無一可愧夫豈偶然
有本如是年垂八十古昔所稀人猶望公胡不期頤矧
如蠢愚于世鮮耦公獨忘年俾與為友其知以心其愛
以德庶幾永久得因蒙益今則已矣流涕橫臆衰病疲

恭不能匍匐緘詞千里寄此心惻哀哉

祭趙忠簡公文

維公兩登上宰俱值阨危之時一斥南荒遂為生死之
別莫非命也豈有他哉事既定於蓋棺恩特容於歸骨
僅脫鯨波之險獲至於斯孰謂馬鬣之封未知所向昔
任昉無漬酒之彥而劉峻廣絕交之書吁嗟此風何獨
今日念嘗游于幕府忍自比於路人冀以告哀言不盡
意

祭待制兄文

嗚呼念昔兄弟幼小艱苦在鄉井間未嘗相捨應舉得
官始出從仕間有離別聲問猶繼惟是入蜀萬里相望
尺書往來動輒經歲首尾五年兄再還朝我亦被召似
非偶然始拜見兄驚歎良久語音雖存形容非舊雖得
團聚未嘗笑樂求醫之外不暇他語未及期月兄請奉
祠飲食稍增意氣亦快終朝接應不見疲倦謂言自此
身心俱閒庶幾休養漸復舊觀如何不淑遽聞訃音惟

兄平生忠信孝友出於純誠表裏如一立乎本朝知無
不言不顧禍福不邀名譽雖有忤心無所致怨雖或異
已莫余敢忤凡百君子孰不流涕矧惟手足痛苦奈何
身縻於茲欲往未可陟岡望之心焉如割嗚呼哀哉

又

於戲兄之云亡于此五月孤嫠無歸浮寄異縣營奉大
事艱苦萬狀地偶得卜塋遂及期天實矜之初豈敢必
念昔與兄同列禁從兄既去國誨言諄諄曰宜退歸行

復相見誰謂俯仰遂成永訣瀝懇叩闕覬得引去庶幾
送死猶可無憾身非已有事與願違向風長號孰知我
哀嗚呼哀哉

祭女四娘子文

維年月日爹爹媽媽以清酌時果庶羞之奠祭于四小
娘子之靈自汝云亡于今一月追念痛苦殆無生意汝
夫於汝死生之際竭誠盡力汝而有知可以無憾今將
舉汝之柩歸卜葬於明州于義當然毋或驚怖為汝父

母事至此此無可奈何惟有撫養汝子望其成立庶能奉汝之祭祀而已嗚呼哀哉

銘誌

黃公墓誌銘

紹興二十有四年應辰通判靜江而黃君克已為帥司僚屬前此嶺南帥守監司相為敵讐屢起大獄其僚各為曹朋以相傾軋至是餘習未殄也而黃君純厚靜重不見圭角衆人方譁而泊然如不見聞往來諸公間亦

莫得而親疎也余竊心重之既而有習於君之家世者
曰此其家法有自來矣因為余言其先君子之詳余歎
曰所謂故家遺俗者此其是也又六年黃君以其先君
子行實屬余為之銘余固不敢辭也乃攷其本末而叙
次之曰公諱陞字進仲殿中丞覺之曾孫朝奉郎孝綽
之孫中奉大夫藝之季子也世居建之浦城至朝奉公
遊東平樂其風土因家焉公與二兄皆登進士第而公
則崇寧二年進士也初授濟州鄆城縣主簿丁中奉公

憂除服為真定府真定縣主簿授鄧州南陽縣丞丁母
憂服除授順安軍司戶曹事改宣教郎授襲慶府仙源
縣丞知真定府真定縣廬州合肥縣邵州永州主管建
州沖佑觀台州崇道觀又除知筠州以紹興八年十二
月辛未卒於臨安旅舍積官至左朝散大夫享年六十
有五諸孤以明年三月丁酉葬公于撫州金谿縣歸德
鄉傳禪山之下公自為縣佐郡有事不能決率以委公
輒辦治真定帥遇吏屬嚴甚動即訶斥公以主簿與之

論是非不少屈帥亦不敢以他吏待之合肥當兵興之際州有急一切賦取于民公隨事力爭有不得已視其等衰而均之吏不得並緣為姦民亦無怨湖南大旱米斗千錢公在永既發官廩賑之又勸富民出粟猶不足給乃請于連帥李丞相願出諸司封樁粟以續之丞相從之沾丐一路永民至今有遺愛焉蓋公之為人雖平居縝密似不能言而剖析吏事精明勇決雖待人和易惟恐傷之而遇事有守權勢不能奪也終身小官處之

泰然于書無所不讀其文以理致為尚有家集十卷娶
魚氏御史中丞周詢之孫有賢行封宜人四男子曰正
已右通直郎曰克已右通直郎新知洪州南昌縣事曰
行已右從正郎廣東市舶司幹辦公事曰立已未仕而
卒四女子長適右職郎吉州永新縣縣令王田功次適
右朝請郎通判黃州軍州事劉符次適右儒林郎通判
軍事判官聶昇又次適右從事郎饒州錄事參軍孫聽
孫男四人銘曰

位不充德其施也小行浮於言知者亦少有子似之不
改其舊天於善人其報則厚

御史中丞常公墓誌銘

御史中丞常公既葬後十有三年其孤裕使其弟袞以
公之世次官封功行來中都泣請于應辰曰孤裕等不
天惟先君子以直道事主上盡言無隱名節聞天下不
幸先君子無祿即世冢上之木拱矣而隧碑未立茲惟
缺典私心慙焉子其為我叙先君子光烈以信於遠而

先君子之死為不亡而孤裕等不孝之罪或得以少追
應辰作而曰噫先正猶日月也非惡筆所能繪畫追惟
風采起敬不忘其闢熙豐之邪說也如闢申商尊元祐
之正論也如尊周孔故呂本中行公之詞有曰排斥異
端回狂瀾于既倒維持正論發潛德之幽光而張九成
撰公之志有曰言路既開臺諫增重異端既黜六經大
明世以為名言應辰復何所容其喙袂請不已應辰聞
其誠而且哀曰敢不惟命試掇其尤者識之謹按常氏

自鼻祖先相黃帝厥後曰季曰惠曰林曰爽班班見於
史傳不絕至唐而袞相代宗唐末其孫宥仕於蜀世為
邛之鶴山人國朝尚書工部侍郎諱元者于公為高祖
尚書屯田郎中諱溥者于公為曾祖大中大夫諱某者
于公為祖監察御史特贈右諫議大夫累贈光祿大夫
諱安民者于公為父光祿在哲宗朝為御史論章惇如
王鳳亂漢林甫亂唐論蔡京姦足以惑衆辯足以飾非
巧足以移奪人主之視聽力足以顛倒天下之是非惇

京北而讒之入元祐黨籍貧不能歸乃徙於陳公其仲
子也諱同字子正生而豐下穎悟不羣七歲侍光祿公
謫滁滁多山水名公卿詩賦記文題刻殆徧公一過輒
能默誦翰林學士曾公肇時為郡守見而異之曾公嘗
與客論近世君子小人公前揖曰涑水君子之魁金陵
小人之首曾公喜謂光祿曰它日挺挺有父風未可量
也十二歲光祿授以六經之學再三覆講無一字誤尤
長于周禮六典圖其儀物驗諸制度不差一日光祿公

詔之曰吾老矣汝其務求師乎吾同年有元城劉先生
同里有宛丘張先生當世偉人也汝欲學義理當師元
城欲學文章當師宛丘于是公兩師之二先生高以評
目政和八年賜上舍及第靖康初上以大元帥置東南
道都總管司差充專管機宜文字建炎二年扈蹕南渡
除知大宗正丞涖職廣右四年召赴行在紹興二年知
柳州又再召三年入見首奏今日之患宰相之權太重
將帥之任太專凡六事累千百言悉請更革以彊國勢

除殿中侍御史才十閱月彈擊八十人其間宰相執政
四侍從十六郎官寺監官十三監司帥守二十六庶官
十五大將六臺綱大振中外肅然四年除起居郎中書
舍人兼史館修撰朝廷命令有不允公論者輒言之坐
是忤時宰意以集英殿修撰知衢州五年請祠以徽猷
閣待制提舉江州太平觀六年除禮部侍郎七年除御
史中丞奏疏凡五十上所論皆小人然所薦趙鼎王庶
李彌遜梁汝嘉劉岑張致遠胡寅張九成魏矼晁謙之

陳正同孫道夫徐度朱松張祁黃陂李杲閻丘昕施廷
臣張絢張戒許忻吳彥章等率又舉之口而不筆之書
何者退小人公則任怨于已進君子公則歸恩于君也
八年秦檜向子諲請與金和潘良貴請戰公慮敵詐和
獨請善備且奏曰檜自金歸受其大帥所傳密諭陰為
金地願陛下察其姦臣嘗論其兄梓今又論檜臣與檜
初無怨隙獨為國事爾上命侍從同議子諲堅執講和
之說良貴大叱之交爭於上前上驚欲抵良貴罪及公

奏事上意子諲戶侍之除公所薦必助于諲也因顧問公乃曰前日以其才可貳版曹而薦之今日之事則不然子諲請和而附檣曲在于諲良貴請戰而忤檣直在良貴上不悅因丐補外以顯謨閣直學士知湖州子諲良貴俱罷當是時趙鼎在廟堂則奏曰常某良貴誠得罪不宜因子諲而出之張致遠在給舍則奏曰不應以一子諲失二佳士張九成在講筵則奏曰若以子諲之故逐右史又逐中司非所以愛子諲在內如黃鶚則詒

書於公曰無將大車之詩大夫悔將小人也其一章曰
無將大車祇自填兮其二章曰維塵冥冥其三章曰維
塵雖兮以言君子之將小人其初則自取洿浼以致病
稍盛則能蔽掩使不得光明之道其卒也壅塞而自重
其累才則薦之而佞則斥之於中丞乎何悔在外如葛
立方則又詒書于公曰昔朱雲論張禹罪成帝欲刑之
則辛慶忌死爭王章直言成帝欲戮之則梅福申救劉
毅以晉武比漢桓靈則鄒湛寬廣帝意陽城論裴延齡

不宜相則張萬福揖衆稱賀數子非有言責猶自奮若
是况為聖主耳目之官以古之正臣自任者乎身雖暫
退而忠節德義滋進矣蓋檜專主和子諲專附檜良貴
廷叱子諲將得罪公先論子諲以救良貴及草章論檜
而公已罷故諸賢皆惜公之去當時公論其不可掩如
此九年促召不就請祠得提舉江州太平觀貧無立錫
地又徙于秀之海鹽縣精舍居焉歷祠祿三任至十三
年凡三召又不就檜嘗遣其客謂公曰人望所繫莫如

公顧幡然一出毋持前論當以參知政事處公公語其
客曰前日之不附是今日之附非也吾寧老死丘園豈
忍上負天子下負所學耶檜益憾十九年十二月十二
日以疾薨于海鹽之寓舍享年六十積官至左朝議大
夫河內郡開國侯食邑一千七百戶實封一百戶天下
學士咸歎惜之二十年十月葬於平江府吳縣長山鄉
金山之原公晚年自號虛閒居士有古律詩表啟詞疏
外制劄狀書序題跋傳記碑銘二十卷名曰虛閒集奏

議十卷烏臺日記三卷多閒錄一卷公自六經而下凡
子史百氏天文地理陰陽律呂兵法字書無不通達雖
多事之秋筆不停綴今藏書數千卷大半手澤也又嘗
親校柳文創刻于柳校蘇子由古史及編宛丘張先生
集併刊于衢以淑後學其記衢之學必推明孫明復石
守道胡翼之李泰伯邵堯夫程正叔之道俾諸生有所
矜式湖之郡博士吳元美能以翼之學規迪湖人則力
薦于上公前後三典名郡其政必以儒飾皆為立生祠

馬公為人凝重端方遠夷鯁亮明而不察直而不訐嚴而不苛仁以庇民智以利物勇以興利除害論事人主前疊疊不倦如乞減月椿免拆民居等事咸以為便乞減鹽法留宿遷縣降附等事活人以千萬計信乎有德者必有言也初娶太子少師滕公友之女累贈大寧郡夫人後娶大中大夫方公元脩之女累封文安郡夫人男八人裕奉議郎新通判武岡軍裡朝散郎新通判湖州祿奉議郎知江州德化縣祿承奉郎知紹興府蕭山

縣丞禪承務郎早世祿承奉郎新知宣州寧國縣丞祿承奉郎監潭州南嶽廟衿承奉郎女二人適蘇玘方導皆名父之子將通籍孫男十人叔孫御孫季孫濬孫昌孫顥孫盈孫漢孫詵孫林孫孫女四人尚幼初公與康與之並鄰居與之以里中子弟謁公于湖以養母為請公創一檢察御書之員月賙緡錢三萬俾奉甘旨與之乃不以為養公聞之愀然因探取數月徑致其母與之怏怏去而之平江求一妓女于知府事周三畏而通判

蘇師德公亞壻也知公絕與之止而勿與與之望公及
二君迺告于檜曰常某死三畏屬師德為文祭之有曰
姦臣在位公棄而死檜為之震怒命中丞俞堯弼劾三
畏錫職命提舉浙西茶鹽公事王珣鞠師德與其子玘
于獄且遣吏卒夜圍公家似若捕囚辟公夫人與裕等
喘息待罪迄無之僅脫虎口然檜猶切齒將族裕等干
祿因以羅織裕等終檜之世不敢調檜亡之明年公以
左中奉大夫致仕以左通奉大夫追贈之命方繼下後

以諸子遇恩累贈至特進嗚呼嚮非天祐正人不其殆哉應辰昔備員策府嘗因轉對及和議曰上下相蒙深為可憂而檜亦以為忤已擯之去國公時為中執法不因晚出嘉其臭味之同繇是受知非一日矣應辰亦以檜亡之明年蒙恩召對累遷至于邇列而裕以發明公之事業見委袂又來請汲汲檜亡矣可以銘矣銘曰

常氏鴻牒代有顯人粵黃迨唐二相秉鈞委質皇朝再世御史皇極之扶是父是子元祐分察斥惇與京紹興

執法斥檜姦朋人不敢言而忠而讜獄獄枋臣竟誣以
黨惟明天子鑒父子忠其亡斯閔其存斯容又子又孫
盛德之驗人懷死羞公罔遺憾太湖之滑長山之顏山
高水深妥靈其間凡百君子仰止嘉則刻詩于碑備太
史擇

文定集卷二十